

四庫全書

集部

欽定四庫全書

華陽集卷二十六

宋 王珪 撰

制詞 批答

賜知許州李璋免恩命不允批答

省表具之卿出于外家襲組高閥擢自先帝統師嚴除
忽陳宿衛之勞乃冀便安之地宜齋場之換節俾輔郡
之膺符既敍寵綽之依遽有撫章之上姑循素請毋或
重辭所免宜不允

明堂禮成文德殿樞密使已下稱賀批答

有制朕三歲親祠季秋大饗緝遺文于曠古振能事于
熙辰肅然上下之通顯有左右之助邦儀就緒神錫均
釐與卿等內外同慶

宣德門肆赦文武百寮宰臣已下稱賀批答

有制朕躬臨泰時既交盼蠻之靈還御端闈遂肆龐鴻
之澤上儀丕就百福來綏凡在搢紳因同慶抃與卿等
內外同慶

賜參知政事趙概乞退不允批答

省表具之夫君欲求治也尊賢然後興士欲申道也趨時若弗及卿躬賢人之蘊履輔臣之榮足以經太平于當時圖永譽于乃後而繼陳函奏願解政幾且年未合經不得謂之知止病而謝事不得謂之徇公勉輔至和遲親嘉訪所乞宜不允

賜參知政事趙概雨灾乞退第一表不允批答
省表具之夫灾祥之應直如影響之隨言貌之違條致

雨暘之變朕茂膺丕命祇憲先猷顧邦治之未孚感天恩之再至廼煩碩輔引咎興言載循非躬望古盈愧矧至精仰格甫銷沴氣之原而感德交修終濟丕平之務欲辭厥位豈副予懷所請宜不允

賜趙概雨灾乞退第二表不允斷來章批答

省表具之夫天之篤右王者自非大失道盡欲扶持而全安之灾變之來初莫不恐懼已則晏然以自若豈所謂答天之實哉比者淫雨之作咎流萬民朕甚懼之今

大異甫銷思與輔政之臣益圖所以興治之本以上當天心卿乃引灾自言而懷去位之計朕何望焉所請宜不允仍斷來章

賜趙概雨灾乞退第三表不允斷來章批答

省表具之比以天序失秭秋霖暴至顧德弗類側身靡寧而卿居與政之司悼為民之害屢引陰陽之變欲還爵秩之榮且永初之推咎台衡豈足銷于天眚樂安之不讐禮義尚何畏於人言益陳乃謀用鑒不逮所請宜

不允仍斷來章

賜叅知政事歐陽修雨灾乞退第一表不允批

答

省表具之灾異者天地之所戒也朕德薄致咎淫雨暴
作下民昏墊離於非辜深惟鬱悼未識厥序非夫一二
股肱之良以交儆予違則信宿之間休氣來應未易臻
此經不云乎萬方有罪罪在朕躬卿何疑而上書乃引
變辭位三復之際予心憮然所請宜不允

賜歐陽修雨灾乞退第二表不允斷來章批答
省表具之朕推鴻範之文貌不恭則常雨致厥罰采漢
儒之所論遇有德則大水乘厥灾故天變之所從皆人
事之所召豈朕失奉神臨人之肅忘尊賢汲善之勤乃
伏陰沴辰淫潦暴物始圖銷異之術爰下責躬之書煩
詰輔之興言引裁符而避位况積流收壑訖無病涉之
虞翳景澄秋猶有登農之望徃其助始終以蒙成所請
宜不允仍斷來章

賜歐陽修雨灾乞退第三表不允斷來章批答
省表具之夫治邦不飭則必致四序之失和天譴之來
又將儆一人之興德今順氣靡洽淫潦為灾重循不穀
之繇方厭已然之效眷言近輔迭上奏函更推變異之
原自引寵榮之戒且君臣相勅當圖庶事之康而暘燠
以時終底九疇之義載惟冲避暑應靈承所請宜不允
仍斷來章

賜宰臣富弼乞退第一表不允批答

省表具之夫抱天材者天下之譽歸履大任者四方之責至故譽之所隆非篤已濟民之畧著則不足以垂永休責之所重非忘身殉國之事興則不足以經至治維爾以奇文大冊寢歷顯塗偉節閱謀遂登上輔靡幾微之不緯罔遐未之弗熙迺言起憲臺章留宸几蓋主議論者以是非之繫必析每聞之情然秉政事者以利害之叅當求今務之適誠究原於異體維跂德于至平奚為函牘之來遽決進退之分且正則不私于物忠則不

顧于時茲朕意之雅圖豈人言之足恤宜收冲挹以輯眷懷所乞宜不允

賜樞密使曾公亮免恩命第一表不允斷來章
批答

省表具之朕延寵邦英倚諧國柄矧陞聯于使號實總制于戎幾故先諏日之良已布告廷之命雖貪謀之允穆猶讓牘之繼陳蓋謙畏者保躬之微忠瘁者事國之大載惟舊德當迫遠猷毋執冲懷以稽明訓所免宜不

允仍斷來章

賜曾公亮免恩命第二表不允批答

省表具之朕紹列聖之序將用人于我家顧元台之臣
數靡安于厥位乃端命枚卜灼求俊心誕陟老成之人
表魁政舉實繁一時之瞻其體仰成無或淹拜所免宜
不允

賜知相州李端愿免恩命第二表不允批答

省表具之卿出重闈之緒承外館之華有溫故之學而

不流世腴有邁倫之資而自躋賢表俾健師牙之盛且旌威苑之英乃抗志以露章欲辭榮而就第夫峻傑者人之所望名器者朕安敢私徃肩忠圖宜畧撓節所免宜不允仍斷來章

賜判河陽富弼免恩命第一表不允批答

省表具之卿躬上賢之資負絕俗之見挺大節以自守履盛名而弗居固辭機務之勞甫遂藩符之佚姑徇素欲奚底撓文所免宜不允

賜殿前副都指揮使武康軍節度使李璋免恩
命第一表不允批答

省表具之國家仰撫乾緯茂建師牙提天下之選才宿
殿中之密衛適圖邦峻之望已穆朝僉之謀迺需贖之
上聞以盛權而力避矧專閭制者重安危之寄總禁卒
者嚴夙夜之思政不可虛材謙豈足應勇難稽邦渙往
治戎昭所免宜不允

賜參知政事孫抃乞外郡不允批答

省表具之卿識度清夷器懷純粹風規表於臺閣猷慮
穆于機衡善則歸君勞不伐已忽願還于陪政廼繼上
于奏函未照委成之懷自期冲退之佚人言胡恤邦寄
是圖所乞宜不允

賜判鄭州宋庠免恩命第一表不允批答

省表具之夫上憲紫樞以道萬微之命外圖良翰以宣
庶政之和蓋重朝刑俗以體均豈遇賢策謀之禮異日者
疇卿老成之望賦予機事之元憂勤百為醇亮一節力

謝權而就逸嘉戒滿之若冲聽守陪藩之封寵分台鉞之拜命已孚于羣聽章猶露于至懷矧左右之前咨方安危之中注徃膺明制終翼丕圖所免宜不允

賜宋庠免恩命第二表不允斷來章批答

省表具之夫履大任者必形于勲德之茂褒元老者必賦以爵祿之尊維卿奮業儒宗凝猷天緯屬四方無事則廟勝之自高復羣又在庭則邦維之日緝奚言流訾之及願解宥謨之煩素倚策于綏平愈亮懷于忠實誠

辭屢至風概靡羣付節三城之雄就藩百里之近雖將
牙之專令具台路之同熙况蒙成萬機固嘗圖夙夜之
勩更宰二枋豈不經文武之謀已恩綽之剪朝猶讓函
之累進材而當寵議亦從公徃服邦休莫還宸渙所免
宜不允仍斷來章

賜樞密使張昇免明堂恩命第一表不允批答
朕候秋歛之期躬帝裡之報夙陳物采備講禮文咨爾
元樞相予祠室肇先經置訖底丕成拜昨均釐告廷乎

寵遽觀上牘有格旌勞徃協邦休庶綏神錫所免宜不
允

賜張昇免明堂恩命第二表不允斷來章批答
省表具之朕躬執珪幣饗于總章而蒙帝顧格者豈曰
予一人之所能今靈輦之下不敢遺四海之諸侯矧予
左右大臣有夙夜在祀之助哉賞而當勞尚何拳拳之
辭所免宜不允仍斷來章

賜同簽書樞密院事郭遠免恩命不允斷來章

批答

卿早司軍要實捍邊衝識行師之先謀負許國之孤節
眷言秉樞之地舊用經武之臣方歷選以命材何過陳
而避寵往裨宵畫益志忠圖所免宜不允仍斷來章

賜宰臣韓琦免南郊恩命第一表不允批答

省表具之朕欽膺皇歷肇舉元禋就神隲之積高奉嘉
邇而薦氣陰靈夕卷瑞景朝凝顧非顯相之孚疇底休
成之應蓋禮鉅者澤究勞深則爵尊奚遜續之遽陳終

渙音之莫復所免宜不允

賜韓琦免南郊恩命第二表不允斷來章批答
省表具之朕以辛未明發飭齋輅于郊越仲冬景至蒙
休燎之氣眷予秉文之輔莫匪在祀之恪故泰元之策
具契三神之歡而盟府之書昇先百寮之冠維靈施之
不可緩維廷渙之不可還何据德之益冲猶封章而荐
至衆埃而舉獨非可辭所免宜不允仍斷來章

賜韓琦免明堂恩命第一表不允批答

省表具之朕歷吉季秋徧祭五室薦豆籩之和氣陳禮樂之盛容神明顧懷福嘏綏輯肆于熙事之就莫匪嘉謨之將渙發鴻休茂旌元弼奚為章牘之至乃有封爵之辭雖亮中懷敢專靈貺所免宜不允

賜樞密副使包拯免恩命不允斷來章批答

省表具之夫左右近司蓋均于執柄之路夙夜密命則歸乎擁樞之廷朕常登進傑髦稽合猷慮以制二邊之靖以佐萬幾之平卿風力峻明器懷端亮伏諫于陞屢

形藥石之忠秉憲于朝一屏姦邪之氣雖正聯于財府
終竚策于政均爰考僉謀遂倚大用況天下至公之進
而君子百福之宜奚煩露章以格成命宜畧誠辭之挹
徃同機務之寅昭發素懷垂永來譽所免宜不允

賜宰臣韓琦免恩命不允批答

夫王者一天下之俗宰臣遂萬物之宜故君臣同德而
教化成朝廷上賢則分職治肆朕承邦之久得卿共政
之均且國用失浮規節財力之匪易吏塗過冗甄序名

器之為難歷勤勞之百為蹈夷險之一致向屬冢卿之
缺適登台席之元稽卜神謀孚言朝聽維百辟之是式
維兆民之是瞻奚興曲讓之辭殊闕大公之舉慊然眾
志鬱于予聞蓋德盛而位隆者望雖與歸然任劇而責
至則事當隨決思體睠毗之異祈收撫固之情徃代天
工毋留邦渙所免宜不允

賜韓琦免明堂恩命不允批答

予臨路寢之上曾覽八紘邈然有通神明之志乃季秋

宗祈既右上帝亦右文考始予齋精臨獻而懼不勝及
觀夫簠樽在堂鍾石在庭至陟降上下之數與夫九州
四海美物之薦罔不具飭噫何其禮之盛歟非爾元宰
之臣孰總裁之故已未之制為百辟先亦皇天降休命
于我家非予之所敢專也今書固辭顧不廢予惠術之
施乎所免宜不允

賜宰臣富弼乞退不允批答

朕肇履邦圖每恭天戒屬初災之在序偶時澤之弗滋

且止于近畿顧民灾之未遠然應不旋日知人事之已修卿還來相予居位未久奚抗章而引咎將援故而辭權雖蹈夫聖賢遠覽之思殆戾于君臣交儆之意勉規弗及終底于成所乞宜不允

賜歐陽修乞退不允批答

夫與政之途蓋天下之責至者叢矣顧雖智勇不能以禦流訾之來前日御史加非于卿朕惟其辭甚悖于義理之文今讒者放而疑者釋卿猶欲以去位豈朕所望

馬傳不云乎禮義不愆何恤人之言其起跡事母重朕之不敏也所乞宜不允

賜文武百寮宰臣已下賀明堂禮成批答

省表具之朕秉季秋之良修大饗之事歷祿清廟升烟紫旻景氣晏溫福瑞紛委羣志飾盡上靈居歆卿等與秉化均相容祀典忽慶函之來詵述熙事之備成舉繁汝能顧匪台德所賀知

賜宰臣韓琦已下賀老人星出見批答

省表具之春乘歲筦當中氣之未分星直天弧已高芒之在夕載考常占之度實為預告之符嘉應之來予心增惕卿等協修邦事昭發乾文顧軼瑞于靈篇願傳休于信牒旅函來上欽嘆良深所賀知仍依奏宣付史館

賀宰臣韓琦已下賀老人星出見批答

省表具之西顥肅物秋陰始中南極耀芒夜漏將旦炳然象載之列告厥壽祺之昌披圖以占懼德非稱卿等協襄政路助燮辰階刻章在廷歸福于上宜垂史牒永

煥時休所賀知仍依奏宣付史館

賜宰臣韓琦已下賀壽星出見批答

省表具之夫天監雖高蓋陽感則不旋日君道匪易若
德隆則能晷星乃顯氣凝于商中駢芒燿于弧外渾史
告異占之象弼臣慶易壽之祥豈獨化之能然亦交修
之致此事昭竹帛將垂不泯之觀義篤股肱還奉來同
之祉載循褒賸益厲忱思所賀知仍依奏宣付史館

賜宰臣韓琦已下賀壽星出見批答

省表具之氣分秋籥瑞著星躔于國為壽考之符在民
見治平之象丕荷靈孚之發益循菲德之兢屬占歷之
告祥遽列章為歸美不遐有佐既均神祚之承無疆惟
休又永信書之載省披之際欽嘆良多所賀知仍依奏
宣付史館

賜宰臣韓琦已下賀壽星出見批答

省表具之素幃御節適臨秋籥之中景緯躔空忽直天
弧之北時之丕應豈獨在予卿等率服大僚與調元化

按靈篇而歸德議史載之流徽省牘之餘以嘉以媿所
賀知仍依奏宣付史館

賜宰臣富弼已下賀壽星出見批答

省表具之西郊肅物適臨秋籥之中南極騰輝忽告星
躔之瑞既表人君之壽又符天下之安其驗焯然何德
臻此卿等履具瞻之地調萬化之元導民氣之至和動
乾文之體應歸上之美亮乃之表宜記信辭共承丕貺
所賀知仍依奏宣付史館

賜樞密使宋庠已下賀壽星出見批答

省表具之灝氣中分舒靈幾望維清臺之占度見南極
之騰芒載稽瑞牒之文實表皇圖之固卿等任均鼎席
謀總機廷輯于二邊之寧陶茲羣物之豫仰動乾緯發
為休符參形歸美之章共被與齡之貺天之祐順史無
愧書所賀知仍依奏宣付史館

賜樞密使文彥博已下賀壽星出見批答

省表具之玉筯凝商適履秋分之後珠躔麗極遽騰天

社之南雖歷考于祥占豈獨孚于眇德顧倚宥謀之重
助裁神化之宜致順象之來符將信書之具紀載披需
奏良集媿懷所賀知仍依奏宣付史館

賜樞密副使胡宿已下賀壽星出見批答

省表具之夫王者修飭五事以當天心則必有休美之
符發于辰象以表顯之朕顧德不明唯舉錯之靡中乃
庚子之晨祥星著見非吾股肱大臣篤躬興化之應與
詩云受天之命四方來賀于萬斯年不遐有佐朕敢專

饗其福哉所賀知仍依奏宣付史館

賜叅知政事歐陽修免恩命不允斷來章批答
卿才粹宇閎文醇論正擢自禁林之從登于樞密之司
收帷幄之先謀導夙夜之密命方懋施于賢縕庸更貳
于政均迺達讓函未昭物聽且士之難進雖識風節之
高然朝之與能必當名器之分宜畧文而之厚遂體道
以為公厥服大僚以毗至化所讓宜不允仍斷來章
賜樞密副使歐陽修免恩命不允斷來章批答

省表具之天之北樞通位帝紀國之右府總制兵謀以
成敗之機故慎于圖事維憂責之重則要之得人適登
髦傑之材參亮丞疑之寄矧沈畫足以制千里之勝精
識足以造萬事之微甫經務以會神忽露章而辭寵顧
至公之是進復羣美之所歸汝德實諧朕言豈再所乞
宜不允仍斷來章

賜叅知政事趙概免恩命不允斷來章批答

省表具之卿清規表競厚望鎮浮溫藻望于帝謨嘉猷

經於國論比貳幾廷之畫適更政席之洛德罔聞而弗
休務有應而皆裕何興言于固避殊抑美于僉謀往復
乃司尚副予倚所免宜不允仍斷來章

明堂禮成文德殿文武百寮宰臣已下稱賀批
答

有制朕涓吉季秋肆裡上帝格孝思于清廟配文德于
總章相維辟公之儀亶有夙夜之勤迨成熙典均錫嘉
祥與卿等內外同慶

欽定四庫全書

華陽集卷二十七

宋 王珪 撰

制詞

批答

賜文武百寮宰臣韓琦已下乞立壽聖節宜允

批答

省表具之赤制告圖肇承題序青煒動陸俯協誕期卿
等過稽舊章列上芳牘緣華封之素祝建壽聖之嘉名
竊惟受天元符撫國休運百辟稱觴而在席四方奉幣

而在廷敢以菲懷抑于輿望所請宜允

賜樞密副使王疇免恩命不允斷來章批答

省表具之夫天之樞極上司化元國之幾廷右幹武事
適延登于峻德以參決于宵謀奚須露章乃欲避寵且
天子之枋惟厲爵祿之公况賢者之陞安待歲月之次
已頒之命宜俛而承所免宜不允仍斷來章

賜使相宋庠乞致仕不允斷來章批答

省表具之朕甫躬萬幾鬱于大道實仰衆德經之遠猷

卿舊弼之臣先朝所器向辭右府屢寄于藩肆纂丕圖
適還在位傳經議政甘盤之學未親緣寵退身老氏之
風何厲露章三至秉節一詞雖欲進徇遺榮之高顧不
終懷勾告之慕往安乃服毋怫予聞所乞宜不允仍斷
來章

賜樞密副使胡宿乞退第二表不允批答

省表具之卿材資粹通識宇高特早事先帝委樞機之
萬徵見知冲人蹈夷險之一德方倚老成之訪以康治

定之功刻章繼來援禮欲去且二帝之佐未聞謝事之賢而三王之朝豈有遺年之議雖嘉冲避良匪通言所乞宜不允

賜歐陽修乞退第二表不允批答

省表具之夫朝廷正則羣峻遊君臣交則大治起予欲上追二帝之盛近摹四聖之休且夙夜以思惟懼弗至而左右之倚遽陳不能雖懷君子獨行之高頗謬二人同心之利豈邦事之未正主道之不交則卿何陳輕去

之辭專屬難進之節顧省厥理茫然靡圖所乞宜不允

賜歐陽修乞退第三表不允斷來章批答

省表具之朕蒙先帝遺烈獲承至尊夙夜震畏不敢荒
寧乃去秋以來敵數內寇邊事靡飭被害有象方春東
作民至乏食流離道路不能自存朕方勉思其所不及
而與政之臣乃圖欲以去朕豈所望焉書不云乎股肱
喜哉元首起哉卿其往綏厥位終厥德亦尚一人之慶
所乞宜不允仍斷來章

賜歐陽修再乞退第三表不允斷來章批答

省表具之朕歷覽聖賢之迹槩見君臣之方蓋合一德者固不能為浮辭所移躬絕節者或未可應羣物之用朕臨位未久悼道弗明方倚大臣同心之謀以經千載不世之治而卿數懷欲去之計自嗜獨高之風豈不念先帝委政之甚勤又將詒冲人遇賢之靡篤往收前慮訖濟大忠所乞宜不允仍斷來章

賜判許州張昇免恩命第一表不允批答

省表具之天子慎名器之公則朝範尊賢者難爵祿之
受則士節勵惟卿被先朝之重遇輔冲人之始圖每辭
政路之榮欲遂耆年之佚逮命藩而加寵復抗牘以敷
懷雖高樂退之風難闕旌勞之拜所免宜不允

賜樞密使富弼免恩命第一表不允批答

省表具之夫宥府經王之武事台司導國之化元安危
出於大謀左右屬之同體維卿命相先帝竭精靡遺鍾
釁而家甄禮莫奪肆纂丕圖之始旋聞喪紀之終戒馳

使軺召冠樞幄矧國哀之未寃實邦務之所咨奚達讓
函乃留渙檢名之適分議可去辭所免宜不允

賜富弼免恩命第二表不允斷來章批答

省表具之夫天下雖無事敢忽備於不虞王者之有征
在制師于必勝謀我兵本倚之樞臣早負大名寢膺重
任文足以緯皇業武足以鬯天威去以終喪靡徇權宜
之事起而復位又陳謙讓之辭雖諒至懷莫還定命所
免宜不允仍斷來章

賜皇長子潁王頊免恩命第一表不允批答

省表具之夫三代之裂土也雖兼胙之親賢春秋之命子也曾莫踰于適長蓋上以尊夫宗廟內以屏于王家眷于冢嗣之良比有近藩之建且德義滋立而寵名未隆宜先同好之盟遂享真王之爵朕履夫尊極豈不念父子之至親質之僉謀時則有祖宗之故事露章忽至秉節自陳雖高難進之風莫反已行之命所辭宜不允賜皇子東郡王顯免恩命第一表不允批答

省表具之周之同宗並建藩屏漢之諸子多留京師朕
欽天序之承厚人倫之愛從爾外傳以勉先訓之聞昨
爾南邦以為夾輔之固忽馳上于需牘願收還于渙音
事出公僉理難冲避所辭宜不允

賜文武百寮宰臣韓琦已下上尊號第一表不
允批答

省表具之朕獲承大統三載于茲蒙天之休海內寧靜
方將飭齊輅潔純犧以祇見天地宗廟之靈乃敢昭發

丕冊揚徽垂鴻以自施乎尊榮者哉不圖執事之臣列
上表功之號且臨政之日淺未有盛烈之章況事神之
意恭豈在彌文之飾適增予媿難徇所陳所請宜不允
賜文武百寮宰臣韓琦已下上尊號第三表不

允批答

省表具之朕守神器之重思王業之難歷日未長涉道
猶淺而三事庶尹搢紳之倫殊隣異俗霜露所墜咸徘徊
闕廷願得鏤寶文章鴻鑠以薦無窮之休茲甚盛德

顧何足以堪之竊嘗覽前世之載近事之實惟至聖為能兼天下之徽惟至功為能饗天下之報慎微端始莫或敢承所請宜不允

賜文武百寮宰臣韓琦已下上尊號第四表不允批答

省表具之昔夏禹不自矜能而閔三代之聲漢光戒諸言聖而振東京之烈朕顧循菲德膺守丕圖亦嘗遠覽其所未形積思其所不及蓋謙恭抑畏者靡不受多福

夸浮侈大者靡不蹈後虞今就陽初郊假廟始裸大懼
無以薦四時之和氣來萬國之歡心乃欲仰摹祖宗之
烈光過跡金石之絕記祇登寶冊駿騰徽稱豈朕所以
答三神之休法後王之意哉雖情見忠者之謂報然文
滋美者未易承也所請宜不允

賜文武百寮宰臣韓琦已下上尊號第五表不
允批答

省表具之朕接神明之統享平富之圖且三歲親郊始

嚴盡物之報而百辟進旅率籲在廷之言考前世之遺聞摹本朝之故事將合羣靈之祉薦敷丕冊之名封章五陳勤懇一志然自躬庶政降異相仍永惟前王跂德不及載視瑣涼之質難居尊美之稱雖欲勉從良不可得所請宜不允

賜宰臣曾公亮免恩命不允批答

夫天文中階之象色正則二氣鈞國柄三事之司體公則萬化輯朕何嘗不寤寐邦傑彌綸政機以惇美風俗

之原以甄序官師之品所繫甚大維材之難卿行足以
屬朝謀足以經國代言二禁而號令鼓乎羣動賦政中
畿而神明照于宿奸頃陪議于宰臣旋冠謨于宥省邦
之維度靡不舉兵之紀律靡不張屬上台之進賢宜右
弼之膺寵忽起舜庭之讓未施鄭國之規羣情鬱然予
心勞止矧夫付安危之幾則望豈云淺當名器之分則
處之勿疑所期廣猷慮以同寅會精神而輔力當抑謙
風之固往調大化之元豈朕之獨致太平亦卿之與有

令聞所免宜不允

賜吳奎免恩命不允斷來章批答

省表具之朕肇親邦務尊用弼臣矧曰舊人之良實為
先帝所睠向居喪制不可奪情茲復政常猶且避寵宜
往収于沖慮期終濟于丕成所免宜不允仍斷來章

賜樞密使張昇乞致仕不允批答

省表具之卿秉德之良職在機密先帝委政遂及朕躬
與定大謀厥功甚茂今羗人跳梁朕方與卿共圖廟堂

之上乃數引疾為言願上印綬以歸故里豈朕所望焉
其近醫藥以自扶持若乃遺榮之事朕則未聞所乞宜
不允

賜張昇乞致仕不允斷來章批答

省表具之朕惟圖廟勝者非獨謀共邦政者須舊德卿
常軸畢慮據經引年乃謂履秉鈞之任則莫匪民瞻負
高世之行則不為俗累需牘三至抗懷一誠雖欲退循
老氏止足之風顧不進念大雅典刑之助倘堅忠槩孰

起浮辭所乞宜不允仍斷來章

賜使相曹佺免恩命第一表不允批答

省表具之朕纂大位而推恩之及天下也不敢遺遐外之臣況國之親賢乎戊辰之制已布在廷其勉承之母廢朕之新命所免宜不允

賜曹佺免恩命第二表不允斷來章批答

省表具之朕膺天地之顧既躬履于至尊述祖宗之謨用丕澤于羣位已布大廷之命況如外戚之賢奚煩露

章乃欲辭寵往收難進之慮期體至公之行所免宜不
允仍斷來章

賜皇長子淮陽郡王頊免恩命不允批答

省表具之昔我祖宗誕受天命厥惟艱哉克正皇猷丕
懋乃績以遺我子孫無疆之休今朕纂厥服惟稽古建
爾元子于有邦乃季秋辛亥羣公庶尹罔不祇朕言于
廷爾乃陳德弗及期畀于一二弟兄之賢我聞曰立愛
惟親立敬惟長其敢示天下以私乎汝惟往哉尚迪時

命無違所辭宜不允

賜皇弟岐王顯免恩命第二表不允斷來章批

答

省表具之向以先園興事同軌戒期迫遵繫聖之彛阻
從大升之駕申念天倫之愛夙陪仙御之行因發感懷
肆加渙命雖搢固辭之牘難停誕告之文所免宜不允
賜皇弟樂安郡王顯免恩命第一表不允批答
省表具之夫立愛惟親人道之大也朕蒙休先帝託于

士民之上惟王親慈同生可勿見愛乎王雖在憂哀而封爵之拜固當博議于有司其勉承之母廢朕顯命所免宜不允

賜皇弟樂安郡王頽免恩命第二表不允批答省表具之朕奄邁大艱不及行高宗諒陰之制王乃退執憂之三年可謂孝子之事終矣封建之命朝廷錫之王庸勿辭所免宜不允仍斷來章

賜皇弟高密郡王頽免恩命第二表不允斷來

章批答

省表具之朕以眇德遺大投艱弟兄急難莫如予愛原
陵終事感至形恩撫章雖來莫徇而請所免宜不允仍
斷來章

賜皇伯祖承亮改封秦國公免恩命不允批答
省表具之夫戚藩之建王室是毗古者皆世襲其封近
代或別予之邑既非祖烈之服又失廟祠之傳故朕推
近屬之長賢修先王之舊履以大子孫不絕之序以均

宗社無窮之休適檻露章過形冲節宜體親親之意庸
光繼繼之圖所免宜不允

賜皇伯崇信軍節度使宗旦免恩命第二表不

允斷來章批答

省表具之時我伯父望為宗英適稽牒以考年已朞朝
而加命奚煩上牘疊欲還恩且國家隆骨肉之親而天
子厲爵祿之枋令下莫反義當則承所免宜不允仍斷
來章

賜皇伯使相宗諤免恩命第一表不允批答

省表具之朕猥以眇冲膺于統序肇臨庶政先錄近親肆敷大廷抑本舊典奚煩謙挹以格澤煒所免宜不允

賜皇伯宗諤免恩命第二表不允斷來章批答


省表具之夫惇叙者聖人之大義名器者天下之至公屬子踐祚之初首沛合親之澤顧僉謀之罔拂豈菲德之敢私雖諒撫懷難俞確避所免宜不允仍斷來章

賜皇伯宗諤免恩命第一表不允批答

省表具之在昔帝王何嘗不崇建藩戚以用自承助乎
今骨肉多而爵位隆顯者少不稱朕所以廣彊本支之
意矧我伯父之尊慈惟作相豈久而不復哉尚何逡巡
以稽在廷之休命所免宜不允

賜皇伯宗諤免恩命第二表不允斷來章批答
省表具之朕繼成基序思大本支載惟燕翼之所承常
慮仁恩之不至矧我近屬冠于列藩適還上鉉之章已
布大廷之聽奚煩需牘固執撫情其往位于鴻樞尚永

毗于皇室所免宜不允仍斷來章



欽定四庫全書

集部

華陽集卷

二十八至
三十三

詳校官庶吉士_臣李如筠

檢討_臣何思鈞覆勘

謄錄監生_臣沈霽

謄錄舉人_臣范翔集

謄錄監生_臣周謨揚

欽定四庫全書

華陽集卷二十八

宋 王珪 撰

制詞 批答

賜皇伯使相宗樸免恩命第一表不允批答

省表具之古者祀有執膳歸於同姓之國所以見愛也
矧予伯父侍祠在郊而秉德嘉粟實相厥成顧無神惠
之報乎乃乙未之命詢謀大同母為過辭以稽我上帝
之貺所免宜不允

賜皇伯宗樸免恩命第二表不允斷來章批答
省表具之朕蒙祖宗之休守天下大器卓卓如不勝乃
仲冬景至獲祠上帝於嘉壇肩然若神靈之下賜之福
祿也禮成熙明朕不敢以專饗嘉與叔父共承之何屢
辭焉所免宜不允仍斷來章

賜韓琦免恩命第一表不允批答

省表具之朕猥以眇質獲承至尊初檻萬幾未昭大道
咨爾元輔濟于丕圖班號在廷議勞有典奚煩冲避以

闕巖瞻所免宜不允

賜韓琦免恩命第二表不允斷來章批答

省表具之卿股肱大臣先帝嘗所改容而禮之也朕蒙
遺德休烈既已布澤四海之遐矧定策禁中以安社稷
褒功賦爵庸敢後乎宜勿重辭以稽我大廷之命所免
宜不允仍斷來章

賜韓琦免恩命第三表不允批答

省表具之朕伏觀乾興詔書受遺之臣咸進位二等卿

先帝所屬以輔眇躬而即祚之恩未加厚也矧予哀荒
在疚而卿憂勞國事夙夜以之豈若先時之比乎夫德
至而寵未報朕甚慙焉戊辰之命其祇勿辭所免宜不
允

賜使相曾公亮免恩命第三表不允斷來章批
答

省表具之卿輔政三朝勤身庶務用式百寮厥績茂焉
乃遠懷遺榮數以引老朕惟卿德幼年高不敢櫻以國

家之務而顧于報功之典猶有慊然曷為拒之深也所
免宜不允仍斷來章

賜參知政事張昇免恩命不允斷來章批答

省表具之夫舜之聰明日謀治於四岳之官於是陰陽
和風雨時百事以敘顧朕匪德實賴一二股肱之良用
保乂我國家維爾迪吉之臣茲庸命爾圖厥政爾尚一
乃心懋昭先后之訓以敷遺我無窮之聞爾乃讓厥位
朕靡懌厥聞嗚呼能厥初惟其終爾其戒哉往祗乃服

母廢予之茂命所讓宜不允仍斷來章

賜文武百僚宰臣韓琦已下乞聽政第一表不

允批答

省表具之夫以朕眇末之身遭國大故嫫嫫在疚若無所容而有司列章遽以聽事為請夫三年之喪猶未成服乃欲臨便殿見羣臣其可得乎所請宜不允

賜文武百寮宰臣韓琦已下乞聽政第三表宜

允批答

省表具之朕奉先帝顧命以付畀四方夙夜憂懼若涉
淵冰今雖悲哀之中不敢違公卿大夫之言以起圖事
然而斷恩從變不亦喪紀之薄乎所請宜允

賜文武百寮宰臣韓琦已下請御正殿第一表
不允批答

省表具之朕離國之憂不及行高宗諒陰之事固已慙
然於懷今易日而除公卿大夫又欲朕御大昕之朝以
延見羣臣朕哀荒未究鬱于大道將何以處之哉所請

宜不允

賜文武百寮宰臣韓琦已下請御正殿第二表

不允批答

省表具之予離國大憂而不能執三年之通喪蓋已徇公卿大夫之言日從事於便坐矣今復俾予臨正朝以垂聽天下之治顧癯然而哀不勝雖曰祖宗之故事豈予小子所敢循乎所請宜不允

賜文武百寮宰臣韓琦已下請御正殿第三表

宜允批答

省表具之夫喪親者自天子至於庶人禮不敢偷也予
遭家之難茹懷荼苦朝夕靡勝卿等乃謂國之萬幾不
可以曠日至三陳悃悃之言顧雖弗從然祖宗之制庸
可廢乎所請宜允

賜文武百寮宰臣韓琦已下乞舉樂第二表不
允批答

省表具之朕荷顧言之重保成業之艱躬信默以永思

奉燕詔而終裕施大曷報創深靡窮且宮隙流陰俯順
縞織之變而賓觴在御忍聞金石之音檻封奏之爰來
握禮文而甚備顧於匪德誠所未安所請宜不允

賜文武百寮宰臣富弼已下請御正殿復常膳
舉樂第四表不允批答

省表具之朕顧德薄不能致陰陽之和而災異比下害
於予民故避殿損膳徹在廷之音庶幾人事修而天意
得也雖嘉澤適應然驕陽旋興側身永思重懷慘結卿

等乃露章繼至願復其常朕方恭天之渝不敢以馳驅也所請宜不允

賜文武百寮宰臣韓琦已下賀災異消復批答省表具之朕嗣守大器述懷永圖叢然萬務之微居若一心之懼乃匪德干異方春爽和陰賴祖宗之靈顯膺天地之施蒙氣遽釋美祥大來眷官師之造庭露章牘之臨几慶逢復旦之會忠發愛君之辭言念肅勤靡忘欣賞所賀知

賜郝質免恩命不允批答

國家提萬兵之勦萃之畿中謀元帥之良護於巖下矧卿嘗從征伐之事加有宿衛之勤宜授鉞於師壇總環宮之夜柝蓋旌勞者必異其寵御衆者必予之權毋為過競其服重委所免宜不允

賜樞密使程戡乞致仕第五表不允批答

省表具之朕惟古輔拂之臣雖年耆德尊或在位者豈薄於風節而怵於聲利哉誠愛君澤民信已行道惟恐

其不至也卿忠實忱明邦之環望秉事二府夙夜乃心
何引年上紱欲循止足之分甚非所以副朕倚老成之
意其務專精神止念慮毋需章以陳以怫於予聞所乞
宜不允仍斷來章

賜判相州韓琦免恩命第一表不允批答

省表具之夫爵傳功則天下皆勸名當分則君子不辭
朕考祖宗之時公相之迹雖有參入輔佐之老而無三
歷難虞之臣今卿功就而不居任隆而又損其始去位

誠恐恩禮之未昭奚為上書猶懷謙畏之靡已知易大
廷之號聽還兩鎮之旄倘復殺恩庸何稱德所免宜不
允

賜宰臣曾公亮免南郊恩命第一表不允批答
省表具之朕猥以眇身託於王公之上夙夜祇栗懼不
能荷先帝遺烈乃仲冬之序獲將犧牲以見天地宗廟
而神靈顧歆錫朕純嘏非吾丞相秉德在祀之助歟議
勞之典宜膺勿辭所免宜不允

賜曾公亮免南郊恩命第二表不允斷來章批
答

省表具之朕景至未明承神嘉壇肅然若風馬之來方
是之時天景粹溫福瑞並貺信乎上帝百神之予歆也
內惟寡德豈能獨致之哉實維予相臣夙夜齋精以共
濟茲舉也祭者必有爵賞之施以及其下況國之元老
乎其勉承之用孚於四海之聽所辭宜不允仍斷來章
賜樞密副使呂公弼免恩命不允斷來章批答

省表具之卿望出相關名昭禁塗德蹈和而日休材應劇而時解薦煩於事允輯厥庸屬羌祲之蒙秋正帥屯之被塞宜筦樞機之務式圖幄席之咨迺爾過辭良非素竚所免宜不允仍斷來章

賜樞密使呂公弼免恩命第一表不允批答

省表具之夫尊上帝之命象在北樞本天下之兵謀於右府屬沖人之初政眷先帝之大臣而卿勞勩匪躬忠忱一德方倚謨明之畧宜專宥密之機頒書在廷勿復

多避所辭宜不允

賜呂公弼免恩命第二表不允斷來章批答

省表具之卿碩望表時敏猷孚國家承英輔之器代有
駿德之人冠於機廷自我定命方仗前箸之決遽形累
牘之辭號已渙於羣觀理莫循於沖守所免宜不允仍
斷來章

賜樞密副使陳升之免恩命不允斷來章批答
省表具之夫衷政之司體均左右之倚本兵之府謀繫

安危之咨維戚畹為能執天下之姦雖盛平不可忽天下之備適登邦傑亶穆師儉矧久服諫垣屢形讜論之益比釐京邑寢廣善聲之聞甫參慮於機庭已下書於綸省再煩讓牘深避寵途雖嘉撫固之懷頗鬱謨明之望毋畱渙典徃贊宥文所乞宜不允仍斷來章

賜陳升之免恩命不允斷來章批答

省表具之國家纂四聖之緒乘百年之安而歲餌厭於天驕塞氛留於氏落眷幾廷之所本維皇武之是經甫

登臨弼之賢實重安危之倚奚為露牘欲遂還恩宜來
翼於邦圖終收奇於廟勝所乞宜不允仍斷來章

賜宰臣陳升之免恩命第二表不允斷來章批

答

省表具之朕持循治綱考慎相位故謀之先定則無他
間任之必固則有專功矧卿迪王佐之幾昭勿聽之美
篤我簡照對於弼諧尚何需牘之陳欲止告廷之渙夢
卜之象已屬陰陽之應已孚惟其肅承是亦終賴所免

宜不允仍斷來章

賜樞密使呂公弼免南郊恩命第一表不允批

答

省表具之朕獲執圭幣初見郊廟而左右之臣罔不夙
夜在事以致力於休成乃乙未之制大告於廷所以均
神惠而答祀勞也雖奉書來辭然自天有命顧可已虜
所免宜不允

賜呂公弼免南郊恩命第二表不允批答

省表具之朕卜歲習祥因郊嚴報肆鴻儀之就緒擁神
貺以來同乃瞻樞衡之臣實陪夙夜之力維議勞之有
典奚系牘之是陳即祇渙命之孚難徇撫情之固所辭
宜不允

賜安武軍節度使郝質免恩命第一表不允批
答

省表具之朕賴天之靈獲主宗廟踐祚之始大賚庶方
時維虎臣提甲巖下豈不夙夜亶有厥勞告廷之書已

決羣聽露章辭寵難徇所陳所免宜不允

賜宰臣韓琦雨災乞退第一表不允批答

省表具之蓋聞天右王者故災異數下以譴告之顧德
不明蒙淫雨之罰水泉涌出壞民室廬朕甚懼焉方反
躬念愆思有以答天之戒而正陽顯見感不旋日豈特
朕力之致哉誠股肱大臣飭正萬事之應也書不云乎
百姓有過在予一人何遽上書欲上大丞相印綬漠然
予心將何寄焉所請宜不允

賜韓琦雨災乞退第二表不允斷來章批答

省表具之朕接隆平之序懷寅畏之心迺素秋之甫成
忽淫雨之暴降然止於近郊則顧其害靡大彌於再宿
則迹其感不遲今人事之已修天變之已返而猶據災
而引咎援故而辭權雖蹈夫聖賢遠覽之思殆謬於君
臣交儆之意書云勅天之命方徯咎繇之歌詩曰畏天
之威始安文王之道勉規弗及終底於休所請宜不允
仍斷來章

賜韓琦雨災乞退第三表不允斷來章批答

省表具之堯被襄陵之災終勤於稽古湯離剪爪之患猶勉於承天朕不能跂二帝之功摹三王之迹而陰陽之靡順風雨之不時未飭厥事之違乃歸有司之責如是則謬於疇采空興四岳之嗟忘於緩人孤式九圍之命尚靳不應宜彌來封所請宜不允仍斷來章

賜宰臣曾公亮雨災乞退第一表不允批答

省表具之朕迹災變之繇率緣象類而至格休平之應

莫匪誠忱之通比積陰以鑿和乃淫雨之降倣稼穡卒
瘁於近甸室廬幾潰於橫流方責躬以永思俄導順而
來復欽惟元德之宰惕奉明威之臨外協釐於庶工內
輔飭於五事奚列章而自咎欲謝寵以為安且堯汾九
年未聞去位之佐而宋災一國猶興罪已之言過實在
予疑何及此所請宜不允

賜曾公亮旱災乞退第一表不允斷來章批答
省表具之朕迹災祥之來緣政教而起乃大河之北民

饑薦臻三輔之交歲暵靡已宿麥將瘁嘉穀未敷方佇
雲霓之興敢愛牲璧之舉而卿內修政事上格天心忽
時澤之應祈已農疇之盈望猶煩需牘遂欲辭權雖嘉
引咎之恭未體仰成之意所請宜不允仍斷來章

賜曾公亮地震水災乞退第二表不允斷來章

批答

省表具之朕獲保宗廟夙夜祇畏顧德不能綏天下乃
甲申地震河朔大水壓覆人民朕甚懼焉卿三朝社稷

之臣方共圖所以應變之術奚遽上書而引咎也昔我
文考嘗因天異下罪己之詔而不敢督過大臣矧予小
子不勅躬自思乃敢聽丞相避位哉所請宜不允仍斷
來章

賜曾公亮雨災乞退第三表不允斷來章批答
省表具之天人之交其微可畏陰陽之沴厥罰有來自
淫雨之下祥已高穹之返聽申眷弼疑之任重懲譴異
之由欲避位於鼎司數置章於軍府無流民之謫而過

援石慶之歸非愆陽之災而固引祖榮之咎在於匪德
良亦非懷所請宜不允仍斷來章

賜宰臣韓琦乞退第一表不允批答

省表具之朕既覽載籍緬懷前人周召終勤於孺子之
朝臯夔豈去夫九官之位蓋欲垂世者篤之於行道本
愛君者要之於盡忠維時上宰之賢實乃先帝所遺甄
序羣品若衡倚平詢質大疑如龜獻兆朕方積思於諒
闇委成於謨明遽聞欲去之言深駭無因而至豈朕鬱

於大道未昭治亂之原將卿保其成功自潔進退之分
夙夜惟念予心惘然所乞宜不允

賜韓琦乞退第二表不允批答

省表具之卿先帝大臣遺以輔朕勤勞夙夜於茲三年
今郊祠甫竣乃露章自列謂陰陽弗序則朕拜貺之辰
何其順氣之不塞虜謂藩翰弗馴則朕親政以來惡有
邊寇之深入乎況民未聞失職官不見墮事卿奚過思
其所不及固欲以去朕哉此朕所以當夕而不寐也夫

宰相之進退繫國家之安危朕其忽諸所乞宜不允

賜韓琦乞退第三表不允斷來章批答

省表具之夫良宰謀朝如執金石之固忠臣衛主何憚
風波之虞卿位總百寮而無隳工事更繫朝而無遺策
屬朕遭家多難享國日淺仗顧命之元老寄皇圖於大
治而忽求自免匪擇予聞矧召公之歷三朝未聞辭位
之事伊陟之格上帝豈及徇身之謀無復重陳庶安仄
念所乞宜不允仍斷來章

賜宰臣曾公亮乞退第三表不允斷來章批答
省表具之朕茂憲古誼欽屬大臣矧曰元德之老濟予
萬事之舉方圖功以加治忽避劇而縈陳雖章本忱辭
然詔已確諭朕惟先王不遺故舊所以厚民風宰相當
知經術所以熙邦化正期尊遇無事過言所乞宜不允
仍斷來章

賜參知政事歐陽修乞退第一表不允批答

省表具之朕猥承先猷適履多難朝廢食以思道夜振

衣而慮危而卿秉詰在朝勞精共政忽露章而滋至迺引疾以為言豈邦論所拘猶抑非常之冊將台德弗類自懷欲去之謀如其不然何以至此顧被過於文考終輔成於沖人往宅厥常毋易而舉所乞宜不允

賜樞密副使陳升之乞外郡第三表不允斷來

章批答

省表具之夫廊廟之上與朕共籌天下事者莫匪一二股肱之良朕比不次用卿固有以謀合朕意者迺人言

紛紛使卿不得安厥位至三露章情見懇激雖欲遠
讒保名以全易退之節然輕用人之禮朕不媿於茲乎
往迪乃猷以體予之素志所乞宜不允仍斷來章

賜宰臣曾公亮乞致仕第一表不允批答

省表具之朕据守成之統有求治之心日圖元老之臣
共起太平之務惟卿功素存於社稷位實倚於機衡何
意累章之來欲辭大任而去矧老而未謝召公猶輔於
康王舊常有恩丙吉終憂於漢帝宜體三朝之遇尚需

萬事之咨蓋迫大公莫循至意所乞宜不允

賜曾公亮乞致仕第二表不允批答

省表具之天子以安危屬大臣宰相之進退重四海載
循匪德肇履不圖每欽遇夫羣材用茂修於庶務矧居
百辟之冠嘗受兩朝之遺報功之典未隆告老之文已
至公毋困我宜安祖考之承或敢侮予終濟國家之治
維其不怠是亦有終所乞宜不允

欽定四庫全書

華陽集卷二十九

宋 王珪 撰

制詞 口宣

賜判運州曹侂生日禮物口宣

有敕卿薦領藩符比持台鉞屬炎煒之杪候紀誕慶之
初辰俾續遐齡式將優禮

賜使相曹侂生日禮物口宣二道

有敕卿德炳台符望華威苑紀誕祥於嘉月推賜式於

王臺以續茂齡以昭異數

又有敕卿緒出勲門位聯台路屬炎蒸之在候紀震夙之當辰爰致寵盼用昌靈壽

賜樞密使文彥博生日禮物口宣

有敕寒生玉瑄望冠星樞紀慶誕之初期有寵盼之舊式庶蕃賢祉以楙邦基

賜判河南府文彥博生日禮物口宣

有敕卿象炳台躔功流鼎路屬設弧之令旦方主鑰於

留都特將恩籙之頒俾侑私庭之慶茲為異數以寵輔臣

賜判北京賈昌朝生日禮物口宣二道

有敕氣凝霜霤任總邊符載臨六射之辰特致上臺之錫俾續壽祉且昭眷懷

又有敕金行之肅爰及素辰邦運之隆是生碩輔載中階之舊德倚北道之全謀將侈厥祥用蕃爾錫

賜使相宋庠生日禮物口宣二道

有敕春籥龔和嶽符涵粹來翼皇圖之楫載臨誕景之
祥飭名閥之嗣賢馳上臺之賜式既資燕喜又輔恩華
又有敕卿入司台鉉出擁帥旋乘在木之照辰紀維熊
之嘉兆素厚弼臣之禮載將御府之頒俾爾熾昌應予
欽矚

賜皇兄北海郡王允弼生日禮物口宣

有敕卿德憑天系名固宗藩載更淑律之期薦紀祥弧
之旦維鼓鐘之在肆維器幣之在庭以侑燕私以綏壽

贈

賜武康軍節度使李端愿告敕口宣

有敕卿望華戚苑機洞戎韜宜錫鉞於齋場更剖符於朔鎮往欽茂命益勵壯猷

賜武城軍節度使知許州李璋告敕口宣

有敕卿入提禁旅顧積厥勤出領藩符庶均其秩載蕃之寵母替而忠

賜淮康軍節度使知曹州張茂實加恩告敕口

宣

有敕比者練吉商辰報成世室既洽神釐之茂有懷邦翰之良使茂馳華詔函賚寵往祇厥服益勵廼猷

賜觀文殿學士知河南府張方平告敕口宣

有敕卿甫畢親喪合還朝位既進班於祕殿且均寄於留都宜體予懷往祇乃命

賜資政殿學士知河中府孫沔告敕口宣

有敕朕甫親萬幾適瞻舊德雖高謝事之舉猶仰濟時

之謀往服寵書起班顯序

賜步軍都虞候趙滋告敕口宣

有敕卿夙明軍志外憺王威進提虎旅之嚴環總星藩之衛往祇茂獎毋墜素勞

賜判鄭州宋庠告敕口宣

有敕卿厚望端朝粹文華國懇避樞位之罷褒陞台鉞之崇往蒞陪藩宜祇顯綍

賜判河陽富弼告敕口宣

有敕卿久服大位勤宣令猷自初違裕之來積有避榮之請已申誕告宜即欽承

賜樞密使曾公亮告敕口宣

有敕卿蘊造微之識資經遠之才久陪論於鼎司宜冠聯於樞省告廷之命當肅以承

賜知相州李端愿免恩命第一表不允口宣

有敕卿大主之子太宗之孫不領將旄之榮何敦戚死之愛往祇成命式獎素勤

賜檢校太尉兼侍中曹侂免恩命第一表不允
口宣

有敕朕纂祖之休型民以孝方隆慈壽之養益獎舅家
之賢雖覽撫函難停寵綍

賜曹侂免恩命第二表不允斷來章口宣

有敕朕愛篤慈闈恩加戚苑再覽需章之避難留渙汗
之華當體倦勤即宜祇受

賜判鄆州曹侂免恩命第一表不允口宣

有敕卿襲慶勲門參華徽府願臨藩而宣績俾換節以旌勤成命之行固宜欽受

賜樞密副使王疇免恩命不允斷來章口宣

有敕國家茂登峻傑參翼機衡方仰輯於邇謀何需陳於避牘宜膺寵答以免欽承

賜同簽書樞密院事郭逵免恩命不允斷來章口宣

有敕國家制必稽先治不忘武睦輯勤於邊瑣特進貳

於神機奚煩撫章以格定命

賜使相宋庠免恩命第二表不允斷來章口宣
有敕卿夙懷賢業薦秉邦均覽避寵之疊封遂均勞於
陪甸往祇明命奚假固辭

賜樞密使富弼免恩命第一表不允口宣

有敕卿舊秉國鈞勞精靡顧奄遭家難執禮莫回適終
喪期且冠樞省才猶屈用義可去辭

賜樞密使文彥博免南郊恩命不允口宣

有敕朕祇祓鉅儀涓成元祀乃眷政均之倚適推神惠之休宜即欽承母煩多遜

賜文彥博免南郊恩命第二表不允斷來章口宣

有敕卿躬咸德之良筦元樞之務肆涓成於邦祀宜茂錫於神休母復過陳其往欽受

賜樞密副使孫抃免恩命不允斷來章口宣

有敕卿學茂才粹身端行方流譽禁游贊微宥命方倚

將明之略且旌冲靖之風謙宜於煩寵宜即受

賜參知政事孫抃免恩命不允斷來章口宣

有敕卿文潤鴻猷機參宥命倚重老成之望更陪政本之司邦寵已行朝僉靡間毋庸再讓往承厥休

賜參知政事趙槩免恩命不允斷來章口宣

有敕卿雅負瓌名茂躋顯序適贊幾廷之畫更陪宰路之熙矧政席之虛賢已寵書之下綍奚煩曲謹以闕羣瞻

賜樞密使張昇免明堂恩命第一表不允口宣
有敕卿筦司機務勵翼謨明顯相精裡熙成濶典蒙天
錫祉蠲旦敷猷忽達謙函匪昭公聽

賜韓琦免南郊恩命第一表不允口宣

有敕朕承天之序旅帝於郊欽惟元德之臣首被靈孚
之澤其往欽荷毋為重辭

賜韓琦免南郊恩命第二表不允斷來章口宣
有敕朕承天元之辰躬郊類之事大格靈歆之貺首均

邦宰之榮其宜肅承母或固避

賜樞密使曾公亮免恩命第一表不允口宣

有敕卿進繇儒術望重師瞻特陞冠於樞聯方圖綏於廟略宜祇茂命難徇冲懷

賜宰臣韓琦免明堂恩命第一表不允口宣

有敕卿總秉化元亮成孝饗肆敷廷渙之寵盖本帝臨之休宜略謙懷庶欽靈施

賜韓琦免明堂恩命第二表不允斷來章口宣

有敕卿應符翼化秉德相祠輯大饗之蕃休答丕勞於
茂獎母煩冲避其往肅承

撫問知延州孫沔口宣

有敕卿向被朝僉出膺邊寄顧封疆之勞慮因霧露之
爽和適及春餘勉綏德履

賜參知政事歐陽修南郊加恩告敕口宣

有敕朕奉玉幣之精躬帝親之享大格靈孚之貺首均
邦輔之榮其宜肅承以應顯陟

賜使相韓琦赴闕生料口宣

有敕卿擁節還朝騰裝遵陸適及郊關之次有懷徒御之勞聊示寵頒用將禮遇

賜武康軍節度使李端愿赴闕口宣

有敕朕總維羣艾振輯丕機有懷肺腑之良尚滯藩符之守方圖親倚宜即召還

賜使相曹佺赴闕生料口宣

有敕卿抗旌啟行握節應召甫及近郊之次豈無風駕

之勞何以將之維牽及餼

賜廊延路副都總管賈逵赴闕生料口宣

有敕卿勞師被塞式遏外虞擁節環宮有嚴中衛稅裝
之始頒餼惟豐

賜知潞州向傳範赴闕生料口宣

有敕卿比易要藩道趨召節方屬炎蒸之序固多跋涉
之勤芻粟餼牢用特渥惠

賜知潞州向傳範茶藥口宣

有敕卿比徙東藩甫臨近甸屬炎威之煩熾顧驛路之
逶遲宜有寵頒用資和嗇

賜判延州郭逵赴闕茶藥口宣

有敕卿夙戒使車來趨召節屬凝寒之在候顧遠涉之
為勞特有匪頒以資保御

撫問陝西宣撫使韓絳判官呂大防等兼賜湯
藥口宣

有敕羌種跳梁邊萌騷繹念使車之夙駕犯塞路之苦

寒宜有寵頒以資冲衛

撫問韓絳等無賜湯藥口宣

有敕羌人背約王旅多屯有煩使指之行適冒祁寒之
候宜蕃珍錫以導至和

撫問韓絳等禦寒衣服口宣

有敕敵侵未夷王師在外惟風霜之所薄固風夜之多
厯特致恩頒更為寒禦

撫問河北路臣寮兼賜夏藥口宣

有敕卿等大河之北為國襟喉被寄之臣勞于經事赤
煒臨候氣以鬱煩良劑所頒益將恩撫

撫問涇原秦鳳兩路邊臣兼賜夏藥口宣

有敕卿等早以器能膺予西寄輯戎備塞時乃之勞炎
曦御辰人或被暍特頒靈劑以輔導調

撫問鄜延環慶路邊臣兼賜夏藥口宣

有敕卿等夙被朝掄薦分邊委屬炎威之嚮盛顧疆事
之多勤宜有寵頒用資冲輔

撫問河東路邊臣兼賜夏藥口宣

有敕卿等外扞邊衝威申信著時惟炎瘴臨事固勞頒
藥上奩用優眷遇

欽定四庫全書

華陽集卷三十

宋 王珪 撰

制詞口宣

賜諸州路知州已下衣襖口宣

有勅歲律迎寒方隅勤事命使輶之夙駕將恩服之時
頒申念爾勞具祇優暱

賜判大名府賈昌朝朝見到闕都城門外排御
筵酒果口宣

有勅卿易藩北道錫對西清載惟行旆之勤適冒炎曦之熾已申郊勞更洽宸頒

賜樞密副使已下罷散乾元節道場酒果口宣
有勅卿等祇率朝裾豫臨楚苑收妙緣于實供來善祝以鴻禧宜示寵頒以資歡集

賜知定州王拱辰告勅并賜對衣金腰帶鞍轡
馬等口宣

有勅洪河之北素極襟喉詞禁之中舊高頗牧兼學士

之三組徙版曹之左卿就錫寵書往祇優寄

賜知青州唐詢告勅并賜對衣金腰帶鞍轡馬

等口宣

有勅卿迪德粹明秉懷高介贊大謨于西掖更美政于
三州每深宣室之思固有周南之滯宜進聯于經幄尚
留愛于明禱特推御府之頒仍飭使駢之遽既優之命
不顯其承

賜知慶州韓絳告勅對衣金腰帶鞍轡馬錢三

百貫文口宣

有勅卿本粹夷之德蹈孤峻之風惜去職于禁游遂分
符于藩守申念論思之舊還儀侍從之聯飭使驛之兼
馳致上臺之蕃錫往吏邊寄祇服朝休

賜天章閣待制知渭州蔡挺告勅銀器衣著并
傳宣撫問口宣

有勅卿適被朝綸再膺邊寄特戒綸函之錫仍加篚幣
之將宜體寵懷亟即欽受

賜元日大慶殿行禮宣勞執儀仗將士口宣

有勅朕班厯春元肆朝邦瑞迎萬祥於穀旦陳盛禮于
大廷申懷列衛之勞猶冒餘寒之氣有嘉忠謹特示眷
存將士等各好在否

賜冬至大慶殿行禮宣勞執儀仗將士口宣

有勅朕祇適先猷肇修冬會眷惟宿衛之士良冒風霜
之勤及此禮成宜膺詔撫將士等各好在否

撫問四路官吏諸軍將校口宣

有勅卿等早被寵掄並宣忠幹維是簡書之畏豈無夙
夜之勞適戒使行聊申詔撫

撫問河北西路沿邊臣寮口宣

有勅大野之衝金城相距維是封疆之守豈無夙暮之
勞時及軫思特將賧撫

安撫河北災傷州軍官吏口宣

有勅卿等方秋御辰淫雨為沴申念在公之恪固多經
事之勤特命撫存以申顧想

撫問廊延環慶路沿邊臣寮口宣二道

有勅卿等遠臨邊守具飭兵防載惟夙夜之勤適在風霜之序有嘉忠瘁特示撫存

又有勅卿等被寄乘邊邕威折敵方祁寒之在候維疆事之多勤歛起寤思用將詔撫

撫問麟府路沿邊臣寮口宣

有勅卿等奉將朝寄分護塞防屬涉夏之初炎念從公之匪懈特申撫諭庸示眷私

撫問保州路臣寮口宣

有勅卿等保塞之衝列城有守念夙經于疆事方重飭于秋防特示撫存用申眷想

撫問梓州路臣寮口宣

有勅卿等奉寄于朝飭躬在事顧山河之載邈念夙夜之多勤特示眷懷以申撫諭

撫問兩浙并淮南路官吏諸軍將校口宣

有勅卿等被寄于朝營職在外歲離水患宵軫邦憂遣

使按行加民存遇眷爾勤事申予撫恩

撫問廣西西路桂邕州轉運提刑知州兵官將
校等口宣

有勅卿等奉寄于朝守封于外秋炎未解嶺道殊賒言
念忠勤式將恩撫

撫問大名府文彥博口宣二道

有勅卿望冠台躔寵司留鑰矧北門之地重方廣莫之
風高馳心王室之覲經慮邊藩之遽特申存撫用篤睦

懷

又有勅卿材隆棟石德茂鈞衡候臨春物之闌地重留
都之寄馳軺將命仄席申懷

賜判延州郭達官告勅牒兼傳宣撫問口宣

有勅卿輟自內樞久臨邊瑣適就更於大鎮終倚輶于
一方尚體沖私即祇嘉命

撫問知北京王拱辰口宣

有勅卿輟禁橐之嚴膺留待之寄適及凝嚴之序有懷

鎮撫之勞宜諭詔音且隆賢遇

宣召翰林學士范鎮再入院口宣

有勅卿夙負環名自躋顯序偶緣書詔之累稍去禁嚴之遊靡遭回之介衷乃樂易而迪德還敷皇藻益裨賢猷今差某官就第召卿入院充學士想宜知悉

宣召翰林學士賈黯入院口宣

有勅卿馳望士林與班禁從比稍違于常豫且聽守于便符未銜會稽之章已虛宣室之席當還儀于內署庶

增繹于皇猷往服嘉恩勉經素業

宣召翰林學士馮京入院口宣

有勅卿力學有原秉心不屈早視北門之草比更大鹵
之符適峻列于中司宜寵還于舊物更從嚴召以獎英
游

宣召翰林學士王疇入院口宣

有勅卿氣節莊厚材謀粹明自執憲以端朝每傳經而
論事方思前席之間宜預北門之遊其勉素懷以申美

業

宣召翰林學士司馬光入院口宣

有勅卿才思穎華風規端劭久侍露門之講兼紬廣內之書器業足以輔皇猷文章足以潤天藻宜與禁除之召益光賢蘊之修

宣召翰林學士楊繪入院口宣

有勅卿秉心不流處義弗撓美才足以端國器鴻藻足以潤帝謨屬因難以去朝甫即吉以還序且奉北門之

訪更華二禁之遊方遲英謀特從嚴召

雄州撫問契丹皇帝賀乾元節人使口宣

有勅卿等使軺聯御聘玉修歡載勤征陸之長適戒候
亭之始爰將詔撫以厚賓儀

恩州賜契丹皇帝賀乾元節人使茶藥口宣

有勅卿等薦修歡聘祇侑誕儀涉春物之寢華馳使駢
而增耀特推珍錫用示厚懷

恩州賜契丹皇太后賀乾元節人使茶藥口宣

有勅卿等將睦隣音申延誕慶爰履載陽之候有勤于
隰之行特命分頒以申存矚

都亭驛賜契丹皇帝賀乾元節人使內中酒果
口宣二道

有勅卿等奉好寶隣荐祥誕會申念使華之勩荐推邦
錫之殊嘉果芳醪頒于御所

又有勅卿等展幣隣封稱觴壽旦留使裝於館下出珍
錫于禁中雖曰常儀本于厚好

都亭驛賜契丹皇帝賀乾元節人使銀鈔羅等

口宣

有勅卿等信達隣音慶祇誕會眷馳軺之遠暨屬授館之初寧賜厚邦儀情孚世好

班荆館賜契丹皇帝賀正旦人使到闕酒果口

宣

有勅隣寶通歡使華將命適及候亭之次聊申燕席之儀爰有常頒以申厚遇

都亭驛賜契丹皇帝賀正旦人使春旂勝等口
宣

有勅卿等奉儀隣聘弭節賓亭驚歲律之荐更慶春華
之滋始宜膺邦錫以道時休

都亭驛賜契丹皇帝賀正旦人使生餽口宣

有勅春華叢朔隣聘修儀就寧館舍之初申厚餽牽之
錫式將殊遇庸獎至勤

恩州賜契丹皇帝賀正旦人使茶藥口宣三道

有勅卿等夙將信檢祇自寶隣並鶩使軒適留郡牒宜將邦錫以浣途勤

又有勅卿等受言于國將命在途爰促飛軒甫經近甸特推邦錫以寵使儀

又有勅卿等信函將命行越半途靈劑均和頒由中禁有嘉勤節庸示厚儀

班荆館賜契丹皇帝賀登寶位人使到闕酒果

口宣

有勅皇圖纂慶賓組來儀均玉笋之芳醪副金盤之嘉
實爰將渥惠聊浣遐征

班荆館賜大遼皇帝弔慰人使酒果口宣

有勅卿等夙戒使駢冒征炎陸馳赴隣哀之遽暫寧候
舍之初申念素勤爰推嘉錫

都亭驛賜契丹皇帝弔慰人使銀鈔鑼等口宣
有勅卿等敦和世好展慰隣憂屬秋暑之未闌涉塞途
之已邈適寧征御爰舉賜常

都亭驛賜契丹皇帝賀登寶位人使射弓例物

口宣

有勅朕茂纂聖圖夙來隣聘惟使輶之遠駕有賓射之
舊儀難阻勝遊聊伸蕃錫

都亭驛賜契丹皇帝賀登寶位人使朝辭酒果

口宣

有勅卿等握節來朝始云終事飛壇上道歛及歸期嘉

果芳醪更頒離席

恩州賜契丹兩番賀正旦人使茶藥口宣二道
有勅卿等春和襲筦隣聘飛壇涉長陸以載勤冒寒威
而良苦俾將珍錫庸示厚儀

又有勅卿等並持使節遠厯塞途懋將隣好之和躬展
歲元之慶特申嘉賜以獎至勤

恩州賜契丹皇太后賀正旦人使茶藥口宣

有勅歲籥將新隣音載睦適及半途之候正衝殘臘之
寒素厚賓儀首推賜式

恩州賜契丹兩番賀登寶位人使茶藥口宣

有勅卿等受言于國將命在塗爰趣飛軒甫經近堞特
推邦錫以寵使華